

## إِنَّ الدِّينَ عِنْدَ اللهِ الْإِسْلَامُ



### لَا الْمُ إِلَّا اللَّهُ مُحَمَّدُ رَّسُولُ اللهِ

# Chutba Jummah

## HADHRAT MUHYI-UD-DIN AL-KHALIFATULLAH Munis Almad Azim

### RAMADAN MUBARAK!

18 Mai 2018 (02 Ramadhan 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Bane Types de Jeûne (Sawm/Roza) ».



Yaaa-'ayyu-hallaziina 'amaanuu kutiba 'alay-kumus-Siyaamu kamaa kutiba 'alallaziina min qablikum la-'alla kum tatta-quun.

« Ô bane ki ena la foi! Le jeûne (carême) fine prescrire lors zot, pareil couma ti prescrire lors bane ki ti avant zot pour ki zot vine pieux. » (Al-Bagara 2: 184).

Zot bizin conné ki dans Sawm (Roza/ carême islamique) ena ene qualité spéciale ki péna dans bane les autres carêmes de bane les autres religions. Allah (swt) fine



donne le *Ummah* de Hazrat Muhammad (saws) ene carême ki spécial, ki pas fine trouver dans bane carêmes de bane les autres prophètes (as).

Kan même Allah (swt) fine dire dans sa verset là ki le 'Roza (carême) fine prescrire lors zot, pareil couma ti prescrire lors bane ki ti avant zot', mais bane conditions et règlements de garde carême fine enseigner dans le Ummah de Hazrat Muhammad (saws). Fine enseigner aussi ki ena ene quantité de bénédictions et de récompenses ki pou gagner dans sak bonne action ki ou fer pendant sa mois béni de Ramadan là, kot sak bonne action li multiplier par 70 fois plisse ki bane jours normal, tel couma faire le Salat (la prière obligatoire (Farz et Sunnah) et volontaire (Nafl)). Bane récompenses là plisse ki bane jours normale et sak bon action ki ou faire aussi ena bane les autres grands récompenses. Même le matin kan ou faire ou Sehri et l'heure Iftaar, sak chose ki ou pé manger pour garde le carême et pour rompre le carême ena bane grands récompenses.

Ene *Rozédaar* suive à la lettre le règlement de *Roza* pendant le Ramadan et mette li en pratique, et à travers sa li montrer ene l'obéissance totale vis-à-vis so Créateur, kot li gagne Le Créateur de l'Univers même comme récompense. *Alhamdulillah*. La plus grande récompense de *Roza* ki ene dimoune gagner alors, c'est la proximité d'Allah. Eski ena sa qualité récompense de garde carême là dans bane les autres *Ummat* de bane les autres prophètes (as)? Allah (swt) dire:

« Sawm (Roza) c'est pour Moi et c'est Moi ki pour donne la récompense pour sa.» (ene Hadith-e-Qudsi rapporter dans Bukhari et Muslim).

Sa connexion là, li assez pour montrer grandeur de *Roza* dans le *Ummah* de Hazrat Muhammad (saws). De la même façon, le Ka'aba Shariff li gagne tout so l'honneur à cause so connexion avec Allah. Allah dire: « Et sanctifier Mo La Maison. » (Al-Haj 22: 27).

### En effet, Roza li vertueux à cause deux concepts importants:

(1) C'est ene action secrète et ene action cachiette; de ce fait, personne depuis parmi la création pas capave trouve li. Et puis 'riya' (l'étalaaz, montrer lizié dimounes) pas capave rentre là-dans!



(2) C'est ene moyen pour subjugue (domine) bane l'ennemies d'Allah. C'est parski le chemin ki bane l'ennemies d'Allah embarquer pour trompe bane fils d'Adam (as) c'est le désire. Manger et boire donne zot la force pour accomplir zot désire. Alors lerlà même zot trouve *Roza* difficile pour garder et tire toute sorte kalité prétexte pour pas garde *Roza*.

Ou conné, ena 3 niveaux pour garde *Roza*: (1) *Roza* général, (2) *Roza* précis et (3) *Roza* le plus précis.

- (1) Pour *Roza* générale, c'est pour empêche l'estomac et parties privées accomplir zot désirs. Et ou remarquer ki dans Ramadan même, ki pendant *Roza* même, *Shaitan* rode influence ou avec sa bane désires là.
- (2) Roza précis c'est empêche (a) lizié guette bane kitchoses interdit (kot sa capave induire ou pou commette bane péchés graves), (b) la langue dire bane kitchoses ki pas bon (couma cause bane causer initile, ou faire palabre, la guerre, diskité kot avec sa la langue là même ou dire bane gros bêtises etc.), (c) la mains faire bane mauvais travails (par exemple, lève la main lors les autres, coquin, tricher etc.), et (d) zoreilles pou commette kitchoses interdits (couma écoute bane kitchoses ki pas pou rapporte ou aucaine récompense divine, et porte zoreilles pou écoute bane conversations ki pas concerne ou etc.), et (e) les reste lécorps commette bane actions fautifs.
- (3) Roza le plus précis, c'est abstention par le cœur pour galoupe derrière duniya (bane zaffaires mondaines) et dirige nous bane pensées vers distance entre nous et Allah. Ene caractéristique important de Roza c'est baisse regard et contrôle la langue. Penser beaucoup avant ki ou causer; faire attention ki dans ou causer même, par mal servi ou la langue ou tranche les autres dimounes avec ou la langue, et pour en bref lors là, en générale contrôle ou lécorps entièrement. C'est sa ki sa verset ki mo fine lire devant ou là veut dire, kot Allah (swt) dire: «Pour ki zot vine pieux.» (Al-Baqara 2: 184).

Pou gagne Allah comme récompense, pas gagne Li coumsa même sa. Ena beaucoup de lutte bizin apporter contre ou-même. Li pas seulement ki ou reste sans manger et boire ki ou dire ki ou *Roza*. Non li pas ditout comme sa. Bizin accompagner avec tous sa bane bons actions là, lerlà ki *Roza* sans manger et boire pour ena tous so valeur, so mérite devant Allah (swt). Celui ki pas abandonne so



bane mauvais actions: bane palabres, la guerre, vey zaffaires dimounes, doutes, jalousie, cause menti etc., alors, Allah pas bizin ki li prive li de reste sans manger et boire couma fine rapporter dans bane Hadiths.

Ene l'autre caractéristique pour *Roza* précis c'est ki ene dimoune pas rempli so l'estomac avec manger pendant la nuit. À la place, li mange juste mesure, parski en effet, le fils d'Adam (as) li pas rempli ene récipient plus malfaisant ki so l'estomac. Si li ena pour mange à so faim dans commencement de la nuit, li pas ti pou capave servi li même bien pendant le reste de la nuit. Pareillement, si li mange beaucoup l'heure *Sehri*, li pas capave comporte li bien ziska l'après-midi. C'est parski manger excessivement amène faiblesse et léthargie (c'est-à-dire, la paresse), et l'objectif *Roza* disparaite à cause excès dans manger, parski l'objectif *Roza* c'est ki ene dimoune savoure goût de la faim et amène li à abandonne so bane désires.

Comprend bien ki ene dimoune ki fine gagne l'intelligence, li conne l'objectif Roza. Donc, li prend ene fardeau d'ene tel niveau ki li dans la capacité pour faire saki plus dans so l'avantage. Ibn Masood (ra) ti pé garde très peu Roza (Nafl) et fine rapporter ki li ti habituer dire: « Kan mo garde Roza (Nafl), mo faible dans mo Namaz et mo préfère Namaz lors Roza (Nafl). » En d'autres mots, li préfère ene acte obligatoire, et donne sa plisse priorité ki ene acte volontaire, additionnel.

Certains de bane compagnons ti affaibli dans zot concentration dans récitation Quran kan zot ti pé garde *Roza*. Ainsi zot garde *Roza* (*Nafl*) moins ziska ki zot capave balance zot récitation. Sak individu li conscient de so condition et la manière pour réciter.

Ena ene Hadith rapporter par ene Sahabi ki dire: « Mone tende Rassoollullah (saws) dire pendant Ramadan: 'Bane la portes Jahannam fermer, bane la portes Jannat ouvert et bane Shaitans enchaîné. Ene ange appeler: 'Ô celui ki envie faire ene bonne action, gagne la bonne nouvelle (de sa); Ô celui ki ouler faire le mal, retenir ziska Ramadan terminer'. » (Ahmad & An-Nasaï).

Roza dans Ramadan li ene l'armure contre l'enfer. Rassoollullah (saws) dire: « Kan Allah fine créer Jannat et Jahannam, Li envoye Jibreel (as) vers Jannat, en disant: 'Guette li et séki Mo fine préparer là-dans pour so bane habitants.' Après ki Jibreel (as) fine quetter, line retourne vers Allah et li dire: 'Par To gloire, personne pas



entende parlé de li (Jannat) sans ki li rentre là-dans.' Donc, Allah fine créer bane chemins difficiles pour rentre dans Jannat. L'heure Jibreel (as) fine ré-visite Jannat li dire: 'Par To gloire mo peur ki personne pas pou rentre là-dans.' Allah dire: Alle vers Jahannam et guette li et guetté ki Mone préparer pour so bane habitants.' Jibreel (as) fine trouver ki li ti en forme de couches, ene lors l'autre. Kan line retourner li dire: 'Par To gloire personne ki entende à so propos pas pou rentre là-dans.' Alors Allah fine faire so chemin rempli de désires. Alors Allah dire: 'Retourne là-bas et Jibreel (as) fine retourner et li dire: 'Par To gloire, mo peur ki personne pas pou échapper pour rentre là-dans'.» (Tirmidhi, Hakim et bane les autres Rapporteurs de Hadiths).

Donc, bane frères et sœurs de foi Islamique, kan ou conner ki *Roza* tuer désires et réduire so sévérité, et ki sa bane désires là amène vers *Jahannam*, à ce moment là ou pour trouver couma *Roza* vine entre ene *Rozédaar* et *Jahannam* et ou pou garde *Roza* dans Ramadan et après Ramadan aussi (bane *Roza Nafl*) dans la meilleure façon possible.

Quran cause à propos bane récompenses de *Roza* et ena bane *Ayat* (versets) à propos de bane ki obéir Allah pour être sauver de *Jahannam*, et ki *Roza* c'est ene forme d'obéissance d'Allah. Plusieurs Hadiths du Saint Prophète (saws) zot claire dans sa contexte là.

Abu Said Al-Kudri (ra) rapporter ki Rassoollullah (saws) dire: « Roza li ene armure avec lequel le serviteur protège li contre du feu. » (Ahmad).

Uthman Ibn Abil-Aas (ra) rapporter ki Rassoollullah (saws) dire: « Quiconque reste ene jour Roza dans chemin Allah, Allah place ene tranchée (ene fossé) entre li et du feu pareil couma entre la terre et les ciels. » (Tirmidhi & Tabarani).

Rassoollullah (saws) dire: « Kan (arrive) premier la nuit Ramadan, bane Shaitaan et bane Jinns rebels enchainer, bane la portes du feu fermer, pas ene seul la porte ouvert et la porte Jannat zot ouverts - pas ena ene seul reste fermer, et ene appeleur lance l'appel: 'Ô chercheur du bien, approcher et Ô chercheur du mal, retenir.' Ena beaucoup ki Allah libère depuis du feu - et sa passer sak la nuit. » (Tirmidhi, Ibn Majah, et bane les autres Rapporteurs de Hadiths).



Jabir (ra) rapporter ki Rassoollullah (saws) fine dire: « Sak jour et sak nuit, pendant Ramadan ena bane dimounes ki Allah accorde la libération depuis du feu, et ena pour sak musulman doah ki li capave faire et ki pour être accorder. » (Ibn Majah, Ahmad).

Pour terminer, nous demande *doah* avec Allah ki Li faire sa Ramadan là vine ene armure pour nous contre du feu l'enfer. *Ameen, Summa, Ameen, Ya Rabbal Aglameen*.

Et *Insha-Allah*, après *Salat-ul-Jumu'ah*, nous pou faire le **Namaz Janaza Ghayb** de mo chère et très respectée disciple de Kerala, **Shareefa Beevi Sahiba (1951-2018)**, ki la première épouse du Amir dans le Sud de Kerala (Mukarram Jamaluddin Saheb). Ki Allah éclaire so chemin vers Li, d'ene telle façon ki li gagne Allah même comme So récompense. *Ameen*.

*Insha-Allah*, zot pou capave lire ene aperçu de so la vie et so bane travails lors le blog du Jamaat ki so cher garçon Fazil Jamal Saheb en charge et fine écrire à so propos.

#### http://sahih-al-islam.blogspot.com/2018/05/shareefa-beevi-saheba-1951-2018.html

Ki Allah béni tous nous bane membres du Jamaat Ul Sahih Al Islam dans le monde et aide zot tous pour atteindre Li (Allah) dans ene l'état ki Allah satisfait et content avec zot tous, surtout à travers zot l'obéissance envers Allah et So Rassool Hazrat Muhammad (saws) et le Khalifatullah ki Li fine envoyer à zot dans zot l'époque. *Insha-Allah, Ameen*.

*Sur ce, mo souhaite à zot tous:* tous mo bane disciples et tous bane Musulmans du monde entier, Ramadan Mubarak!